



اساہڑے آس پاس ناماحول

اساہڑے آسے پاسے جیہڑی ہوا پانی، بیل بوٹے ہوور ہزاراں قسم نے
 جاندار ہین، ایہہ اساہڑا ماحول ہے۔ انہاں ساریاں ناک دُوے سنگ ڈوہنگ
 تعلق ہے۔ جے کر انہاں بچوں کوئی اک وی خراب ہوئی جائے تہ سارا ماحول
 ہی بگڑی جانا ہے۔ اس ناساں ور بہوں مندہ اثر پینا ہے۔ تِساں کدے سوچیا
 جے اَجکل بکھ بکھ قسم نیاں ماندکیاں وباء نی شکل بچ۔ کھنڈی گئیاں ہین۔ کینسر
 نی ماندکی داخ ہی تکو جے ایہہ کتنی کھلری گئی نی ہے۔ اسے طراں دل نے
 بیماراں نی گنتر وی دن بہ دن بدھ رہی ہے۔ اکثر لوکاں کی ساء کھنٹیاں

تکلیف کیاں ہونی؟ موسم کیاں بدلی گئے؟ جیٹھ ہاڑ بچ ہوں گرمی کیاں ہونی ہے؟ سیالے بچ برف کیاں کہٹ بھرنی ہے؟ دریاواں نا پانی کیاں گیندلا ہوئی گیا؟ صاف پانی نیاں باولیاں تہ کھوہ کیاں سُکی گئے؟ ایہہ سارا گجھ ماحول نے بگاڑنی وجہ تھیں پیدا ہو یا ہے۔ اس واسطے اس آپوں ذمہ وار ہاں۔

چکھلی اک ڈیڑھ صدی تھیں آبادی بچ ہوں باہدا ہو یا۔ اس باہدے سنگ ضرورتاں کی پورا کرنے واسطے پیداوار بچ باہدا کرنے نی بڑی کوشش کیتی گئی۔ صنعتی انقلابے انسان کی مشیناں تھیں واقف کرایا جنہاں نی مدد نال پیداوار پہلاں کولوں ہوں زیادہ بدھی گئی۔ اسراں اساہڑی بدھی ہوئی آبادی نیاں ضرورتاں پوریاں ہوئی گئیاں۔ غلہ پیدا کرنے واسطے آساں زیادہ تھیں زیادہ زمین ور غلہ پیدا کرنے نی کوشش کیتی۔ اس مطلب لئی آساں جنگلاں کی کپنا شروع کری کہندا۔ کارخانے لگنے نال ماحول ہوں خراب ہوئی گیا۔

قدرت نے بنائے ہوئے ماحول کی آساں تھس تھس کری چھوڑی۔ مثال نے طور ور ہوا پانی، جنگلاں تہ جانداراں بچ اک خاص قسم نامیل جول سا۔ بدھنی ہوئی آبادی، کارخانے تہ مشیناں نے استعمال نال سارا ماحول بگڑی

گیا۔ کارخانیاں تہ فیکٹریاں نے بچوں نکلنے والے تھوئیں نالے ہور زہریلے
مواد اساہڑے ماحول کی بھتا گندا کری چھوڑیا۔ ہوا پانی ہور ساری زمین
زہریلی ہوئی گئی۔ گڈیاں نے تھوئیں اساہڑے آسے پاسے نی فضا کی ہور
زہریلا کری دتا۔ ایہہ ساریاں گیساں ہوانچ جمع ہوئی گئیاں، جس نی وجہ تھیں
ساہ کھنیاں ایہہ سارے زہریلے مادے اساہڑے وجودنچ چلے جانے ہین
تہ بکھ بکھ بیماریاں کی جنم دینے ہین۔

انہاں ساریاں گیساں تہ زہریلے مادیاں نے باہدے اساہڑے
ماحول کی بہت نقصان دتا۔ کجھ گیساں فضا نچ تیزاب پیدا کیتا، جس نی وجہ
تھیں بے شمار مُلکاں نچ تیزابی بارش وی بہری۔ اس تیزابی بارش نال
اساہڑے بوٹے، جڑی بوٹیاں تہ جانداراں کی ڈاہڈا نقصان پچیا۔ آج کل



زیادہ تر دریاواں، کٹھیاں تہ باولیاں ناپانی پینے نے قابل نہیہ رہیا تہ نہ ہی
سگ لانے واسطے رہیا۔ نال نال پانی نے جانوراں کی بھتا نقصان ہويا۔
مچھیاں تہ دُوے پانی نے جاندار بے شمار بیماریاں نے شکار ہوئی گئے۔

ہوا، پانی ہو ر فضا کی صاف رکھنے واسطے قدرت اک بہترین نظام رکھیا نا
سا۔ زمین نی چھاتی ور کھنڈے نے جنگل ایہہ کم بڑی خوبی نال کرنے سن۔
ہوا بچ ملے ہوئے زہریلے مادیاں کی چوسّی کہننے سن، جس نال ہوا صاف ہوئی
جانی سی، پر جنگلاں کی کپنے نی وجہ تھیں اسا ہڑے آسے پاسے ناسارا نظام بگڑی
گیا۔ ماحول نے بگاڑنی وجہ تھیں ساری فضا گندی ہوئی گئی۔

سانسدان آکھنے ہین جے ہر ملک نا اک تہائی حصہ جنگلاں نال ٹھکیانا
ہونا ضروری ہے۔ آج اسا ہڑے ملک نے صرف یاراں فیصد حصے ور ہی
جنگل موجود ہین۔ اس وجہ تھیں آج کل موسماں بچ تبدیلی آئی گئی ہے۔ گرے
ڈاڈی گرمی تہ روڑے نی وجہ تھیں فصل ختم ہوئی گئی تہ گرے سخت سیلاب تباہی
مچائی چھوڑی۔

ترقی بچ فائدے وی ہین، پر نال نال بہوں نقصان وی ہین۔ پر ایسا
طریقہ کار کیتا جائے جے ترقی نے نال نال نقصان کھٹ تھیں کھٹ ہووے۔

صنعتی انقلاب نال اساہڑی زندگی نیاں بہت ساریاں تنگیاں کھٹ
ہوئی گئیاں، پر مُشکلاں نے بچ وی بہوں باہدا ہوئی گیا۔ جنگلاں نے جنگل
اُجڑی گئے۔ شہراں تہ گراواں نی ہواز ہر بن گئی۔ صاف سُتھرے پانی زہریلے
ہوئی گئے۔ بیماریاں وباء نی شکل اختیار کری کھندی۔

اُج کل اساہڑے سائنسدان اس طراں فی ٹکنالوجی ورسوچ وچار
کرنے ہین جس نال ماحول کی بُرے اثرات تھیں بچایا جائے۔ ایہہ کوشش
وی کیتی جا رہی ہے کہ جیہڑا اساہڑے ماحول وں پہلاں مندا اثر پیا ہو یا ہے
اُس کی وی ختم کیتا جائے۔

اس طراں کارخانیاں، گڈیاں تہ ہور انجناں بچوں نکلنے والے تھویں
پُر روک لائی گئی ہے، تاں جے اساہڑا ماحول صاف سُتھرہ رہوے نالے بکھ بکھ
بیماریاں تھیں انسان کی بچایا جانی سکے۔ اس مسئلے ورسارے لوکاں کی وی اک
خاص نظر رکھنی چاہنی ہے تاں جے حکومت سنگ پرالا کری ماحول کی صاف
سُتھرہ رکھی سکاں۔

1۔ اوہکھے لفظاں نامطلب:

گہرا	:	ڈوہنگا
کھلری۔ اگے پچھے ہوئی جانا۔ بکھری جانا	:	کھنڈی
سردی ناموسم	:	سیالا
اضافہ	:	بابدا
تباہ۔ برباد	:	تہس نہس
نالہ۔ گسی	:	کٹھا
تریا حصہ۔ تیجا	:	تہائی
بیماری	:	ماندکی
مدد	:	پرالا
زمی کی پانی سنگ تر کرنا	:	سگ

2۔ مندرجہ ذیل سوالاں نے جواب دیو:

- (۱) ماحول کس کی آکھنے ہین؟
- (۲) ماحول نے بگڑنے نال کیہڑیاں بیماریاں لگنیاں ہین؟

- (۳) ماحول کی بچان واسطے آساں کی کہہ کرنا چاہی ناہے؟
 (۴) ماحول کی خراب کرن بچ انسان ناوی ہنتھہ ہے وضاحت کرو؟
 (۵) تیزابی بارشاں کیاں بہرنیاں ہین؟

3۔ خالی جگہاں کی اسے سبق بچوں لفظ ہنی تہ پُر کرو:

- (۱) تہویں نال ماحول..... ہوناہے۔
 (۲) پچھلی اک صدی تھیں..... بچ بہت باہداہویا۔
 (۳) قدرت نے بنائے ماحول کی آسا..... کری چھوڑیا۔
 (۴) آج کل جنگل..... ہوئی گئے۔
 (۵) آساں ساریاں کی رلی ملی ماحول کی..... رکھنا
 چاہی ناہے۔

